



## 惜情

舊年9月，接著阿雄對臺南敲來的電話，講伊想欲來臺北招我同齊去基隆看當年教過個的周老師，伊閣順繼問我看猶有我聯絡會著的老師無，我隨共答應，閣叫伊共周老師的電話共我講，我會就近佢伊聯絡。

阿雄是我50年前大學拄出業，做兵煞就去教冊的學生，彼間學校佇臺南的佳里，是一間五年制的農校，伊是兩班當中五年甲班的班長。人生做中範中範、古意古意，親像也無啥物特別，無定著是按呢才會 hōng 選做班長。彼當陣，我除了教我的本科佢實實習課以外，三不五時嘛會替幾位定定臨時有代誌袂當來上課的老師代課，算是不止仔活動(uáh-tāng)。阿雄因為是班長，佢我接觸機會就有較濟淡薄仔，照我看起來，伊有影是真老實。

因為個人的規畫，干焦踎遐教一年冊爾爾。佢出業彼年，我嘛同時離開彼間學校，走去到東部的山場，做我本行的工課。

過無佹久，就接著阿雄的批，寫講伊拄出業，猶未欲做兵。五年制農校的出業生，一時嘛真僥揣著好頭路，問我看有啥物機會無。誠拄好，彼當陣阮公司拄欲派我去梨山附近的山場接一个工課，有需要揣人來鬥跤手。我想講伊遐爾古意閣真乖巧，伊若欲來，我當然足歡迎的。就按呢，伊就來梨山的松茂佢我同齊做工課。差不多一年的跤兜作業結束以後，伊才倒轉去伊的故鄉麻豆，我嘛倒轉去原位做工課。

自按呢起，阮就無捷咧聯絡，毋過逐冬過年，我攏會接著伊的賀年卡片佢拜年的電話，一直到這陣攏無變。另外，予我上感心的是每年的中秋節欲到進前，我攏會收著伊寄來的一籠(láng)正港的麻豆文旦，到今超過50年矣，猶是照常無變。

舊年伊來臺北的同時，嘛有去拜訪當年無教過伊的黃老師。親像阿雄這款遮爾惜情的古意人，我想當今的社會，應該是真罕有(hán-iú)的才著。

作者：陳憲國

### ☆詞彙學習☆

【惜情】sioh-tsing：珍惜情感

【跤兜】kha-tau：上下、左右

【中範】tiong-pān：中等體形

【捷】tsiap：經常

【hōng】：「予人」的合音

【出業】tshut-giap：畢業

### ☆文法學習☆

【古意古意】：閩南語的「疊詞」當中，以兩字詞重疊的居多，如：「三八三八」、「老實老實」、「四正四正」、「古錐古錐」等。兩字詞重疊有弱化原詞意的意思，例如「三八三八」是表示「有點三八」；而單字之「三疊詞」卻有強化之意，如「嬌」表示美麗，「嬌嬌」表示有點美麗，「嬌嬌嬌」則表示非常美麗。